



खुसि मापदण्ड पीडिततय्सं चिरिबाबु नापलाइगु चरणवद्दु आन्दोलनया घोषणा याय्गु तयारी

• लहना संवाददाता

सर्वोच्च अदालतया परमादेश पीडित जूषि व सतक विस्तार पीडित जूषिसं थौं यल महानगरपालिकाया मेयर चिरिबाबु महर्जनयात ध्यानाकर्षण पौ लःलाइगु जूगु दु। संघर्ष समितिया संयोजक सुमन साय्मिया कथं थौं मेयर महर्जनयात ध्यानाकर्षण पौ बीत्यंगु खः। उक्तथं हे संघर्ष समिति याकनं हे सहरी विकास मन्त्री प्रकाशमान सिंहयात नापलानाः ध्यानाकर्षण पौ बीगु तयारी जुयाच्चंगु खँ नं संयोजक सुमन साय्मि कनादीगु दु।

थ्व स्वयां न्ह्यः वंगु आइतवाः पीडिततय्सं यँया शान्ति वाटिका छू च्याली पिकयाः यँ महानगरपालिकायात ध्यानाकर्षण पौ बिउगु दु।

सतक विस्तार पीडित संघर्ष समिति व खुसि मापदण्ड पीडित संघर्ष समितिया संयोजक सुमन साय्मिया नेतृत्वय् वंगु पुचलं यँ महानगरपालिकाया मेयर बालेन साहयात ध्यानाकर्षण पौ बीगु कुतः याःगु खःसां नं मेयर साह आन्दोलनकारी वइगु सुचं वय्वं हे थःगु ज्याकुथिं पिहां वंगु कारणं यानाः यँ महानगरपालिकाया प्रशासकीय अधिकृत प्रदिप परियारयात ध्यानाकर्षण पौ बिउगु खः।

संयोजक साय्मिया कथं न्हापां प्रशासकीय अधिकृत परियारं नं वय्कःपित नापलायत अस्वीकार याःगु खः। लिसे प्रमुख प्रशासकीय अधिकृत परियार ध्यानाकर्षण पौ बीत वीपित थःपनिगु ध्यानाकर्षण पौ दर्ता यानाः हुँ धकाः धाःगु खः। तर आन्दोलनकारीतय्सं थःपिं पौ दर्ता याय्त वयागु मखसं ज्याकूया प्रमुखया ध्यानाकर्षण याय्त वयागु खः धकाः धाय्वं तिनि प्रमुख प्रशासकीय अधिकृत परियारं न्याम्ह प्रतिनिधितय्त सःताः नापलाःगु खः।

प्रमुख प्रशासकीय अधिकृत परियारयात नापलायगु इवल्य सुमन साय्मि खुसि सम्बन्धी सर्वोच्चया परमादेश लिपा यँ महानगरपालिकां गुगुं नं कथंया अध्ययन मयासं यकःति सुचं पिकाःगु धासं उगु सुचंयात यँ महानगरपालिकां खारेज यानाः सर्वोच्च अदालतया परमादेश विरुद्ध पुनरावलोकन याय्माःगु माग यानादीगु खः।

लिसल्य प्रमुख प्रशासकीय अधिकृत परियारं यँ महानगरपालिकां अदालतया आदेशयात पालना जक यानागु खः धासं पीडित जनतायात क्षतिपूर्ति बीगु खँ नं सुचल्य दुथ्याःगु



सुमन साय्मि, संयोजक
खुसि मापदण्ड पीडित संघर्ष समिति

तर्क यानादीगु खः। लिसल्य आन्दोलनकारीतय्सं क्षतिपूर्ति व मुआब्जा धइगु बिस्कं बिस्कं विषय खः धासं यँ महानगरपालिकायाके मुआब्जा बीगु हैसियत दु ला धकाः न्ह्यसः तःगु खः। उक्तथं हे संघर्ष समिति आम सर्वसाधारण जनतायात उठिबास याय्गु ज्या यँ महानगरपालिकां याय् मजिउ अडान काःगु खः।

च्याली सहित ध्यानाकर्षया पौ बीत यँ महानगरपालिकाया ज्याकुथिं थ्यनेवं दकल्य न्हापां नगरपालिका सुरक्षाकर्मीतय्सं दुमकाय्त स्वःगु खः। तर उमित ख्वाच्चः बिवं तिनि तले छ वःगु खँ सुमन साय्मि कनादीगु दु।

यँ महानगरपालिकायात ज्ञापन

“खुसि सम्बन्धी सर्वोच्चया परमादेश लिपा यँ महानगरपालिकां गुगुं नं कथंया अध्ययन मयासं यकःति सुचं पिकाल । उगु सुचंयात यँ महानगरपालिकां खारेज यानाः सर्वोच्च अदालतया परमादेश विरुद्ध पुनरावलोकन याय्माः।”

पौ बीधुंकाः च्याली हाकनं उपत्यका विकास प्राधिकरणया ज्याकुथि वनाः अधिकृत नवराज पोखरेलयात नापलानाः सर्वोच्च क्वःछिउगु खुसिया मापदण्ड खारेज याकेत इनाप यानादीगु खः। लिसे पुचलं प्राधिकरण रोक्का यानातःगु स्वनिगःया थीथी थाय्था जग्गा फुकुवा याय्माःगु मखुसा मुआब्जा बियाः अधिग्रहण याय्माःगु माग नं याःगु खः। लिसल्य अधिकृत पोखरेल थ्व विषय थःपिसं अध्ययन यानाच्चनागु व उकिया बारे लिपा जानकारी याकेगु खँ धयादीगु खः।

खुसि सम्बन्धी मापदण्डयात कयाः आः संघर्ष समितिं थीथी नगरपालिकायात नं ध्यानाकर्षण पौ

बीगु तयारी यानाच्चंगु खँ संयोजक सुमन साय्मि कनादीगु दु। वय्कः सर्वोच्च अदालतया परमादेश विरुद्ध थीथी थासय् खुसि पीडित लिसे सहलह जुयाच्चंगु व सहलह लिपा थीथी कथंया आन्दोलन ज्याइवः घोषणा याय्गु तयारी जुयाच्चंगु खँ नं कनादीगु दु।

थ्वहे इवल्य यँ महानगरपालिकाया मेयरयात ज्ञापन पौ बीत वंगु खःसां नं वय्कः न्हापां हे ज्याकुथिं पिहां वंगुलिं उकियात कयाः आलोचना शुरु जूगु दु। महीग थीथी सामाजिक सञ्जालय् पोस्ट यासं ‘जनतायात हे नाप मलाइगु मेयर छु याय्त’ धइगु न्ह्यसः थनातःगु दु।

श्री हल्चोक आकाश भैरव समाजया प्रारम्भिक साधारण सभा



लहना वाःपौ/श्री हल्चोक आकाश भैरव समाजया प्रारम्भिक साधारणसभा न्ह्यु ज्यासना पुचः ल्यसं क्वचाल ।

थ्वहे वंगु भाद्र १५ गते शनिवाः हल्चोकय् जूगु साधारणसभाय् शेरबहादुर पुतुवारया नेतृत्वय् दुगु समितियात हे न्ह्यु ज्यासना पुचः कथं ल्यःगु खः।

न्ह्यु ज्यासना पुचलया न्वकु जीवन पुतुवार, छ्याञ्जे सुरेन्द्रभक्त श्रेष्ठ, ल्यूछ्याञ्जे शुक्र पुतुवार,

दाभरि सुन्दर पुतुवार व दुजःपिं नृपेन्द्रलाल श्रेष्ठ, अर्जुन पुतुवार, पुर्ख पुतुवार, दानकान्छा पुतुवार, सुनिता पुतुवार व लक्ष्मी पुतुवार च्वनादीगु दु।

नागार्जुन नगरपालिका ३ वडाया अध्यक्ष उमेश लामाया मूपाहाँसुइ जूगु ज्याइवल्य हल्चोक आकाश भैरवया पुजा याना वयाच्चनादीपिं नरबहादुर पुतुवार व थकुवा पुतुवारयात लय्पतिकं बिया ल्यं ७ पेजय्





नेवा: राष्ट्रिय म्ये

चमि : दुर्गालाल श्रेष्ठ लय् चिनामि : तिर्थ माली

धुन दने धुन सँन्त्यलं भी फुककं हे छम्ह जुइ धुन
भीगु लागाय् भी स्वयं हे जः जुया धुन लुइ धुन
ह्यांगु भुमिइ अष्टमण्डल ह्यांगु चाः दुने थी नगु
भीगु नेवाः ध्वाँय् थ्व हे खः ज्यान भी सकस्यां छगू
जातितय् स्वायत्त राज्य लुइ कर्प च्वय् भिलिमिलिं
राष्ट्र भःभः धाय्क न्ह्याके भीगु चःति भीगु हिं

सम्पादकीय



सहकारीया समस्या याकनं ज्यंकेगु योजना ह्येमाल

थीथी सहकारीपाखे यक्वः बचतकर्तातय्गु बचत
यानातःगु ध्यबा हिनामिना यानाः नीप्यम्ह विदेश्य बिसिउँ
वनाच्चंगु दु। जिबी राई जक हे १६ अर्ब दुरुपयोग याःगु
द्रुपं बियातःगु दु। राई यँ, पोखरा, वीरगञ्ज, बुटवल
नाप यक्वः शहरय् सहकारी संस्थाय् सर्वसाधारण जनतां
बचत यानातःगु ध्यबा हिनामिना याःगु खः। अय्न् प्रहरीं
राईयात आःतक ज्वनेफुगु मदुनि। प्रारम्भिक अनुमान कथं
राई मलेसियाय् सुलाच्चंगु दु। तत्कालीन गृहमन्त्री रवि
लामिछाने नं मलेसियाया गृहमन्त्रीलिसे खँल्हाबल्हा जूगु खः
तर राईयात नेपाः ह्यमफुगु खँ धाःगु खः।

बिसिउँ वनाच्चपिं नीप्यम्ह मध्ये अप्वः धइथें
भारतं पिने वनाच्चंगु अनुमान नेपाःया प्रहरीं याःगु दु।
भारतय् च्वनाच्चपिंत नेपाःया प्रहरीयात लःल्हाय्त भारतीय
प्रहरीयात अःपुइगु खः। तर मेमेगु देशय् थ्यने धुंक्पिन्त
कूटनीतिक पहल यानाः हे नेपालय् ह्येमाः। थज्याःगु कुतः
नेपाल प्रहरीं मखु, सरकारं हे यायेमाः। बिसिउँ वःपिं मध्ये
पोखरा व बागलुङय् सहकारी संस्था संचालन यानाच्चम्ह
देव नेपालीं उगु ध्यबा पुलेत सार्वजनिक अपिल याःगु दु।
व्यक्लं याःगु अपिल धइगु थःगु सम्पत्ति मियाः भुक्तानी
यायेत खः। उकिया निति सरकारं वातावरण दय्केमाः।
मेखे देश्य दुपिंत नं प्रहरीं ज्वनाः हिरासतय् तयातःगु दु।
उकिं मध्ये आपालं जेलय् दु।

संचालकतय् जेलय् तःसां नं सर्वसाधारणया ध्यबा
लित बीफयाच्चंगु मदु। विशेष यानाः अपराधी व ठगे
याइपिंत ज्वनाः जेलय् छ्वयाच्चंगु दु। थुकिया नापनापं
सर्वसाधारणया ध्यबा लित बीत सरकारं कुतः यायेमाःगु
खः। थ्व धाःसा जुयाच्चंगु मदु। आपालं सहकारीया थःगु
हे सम्पत्ति दु। अले सम्पत्ति दुगु सहकारीया सम्पत्ति मियाः
जुसां जनताया ध्यबा लित बिइमाः। प्रहरी अज्याःपि
ठगतय् ज्वनाः उमिगु सम्पत्ति मियाः जनताया ध्यबा
लित बीगु कुतः याय्माः। तर उकिया नितिं सरकारं ठोस
योजना हःगु खनेमदु।

सहकारी पीडिततय्सं थःगु बचत ध्यबा लित बीमाल
धकाः सः थ्वय्कूगु निदँ दयेधुंकल। सतकय् वया सः तयेगु
ज्या दिक्गु मदुनि। तर सरकारय् च्वपिसं छगू सहकारी
हे समस्या ज्यंके फयाच्चंगु मदु। संसदीय छानविन समितिं
भदौ ५ गते दुने प्रतिवेदन तयार यानाः सरकारयात लःल्हाय्
त्यंगु दु। अनुसन्धानं दोषी ठहर जूपिंत कारवाही यायेगु
जिम्मेवारी सरकारया खः। मुख्य खँ सर्वसाधारणया बचत
लित बीगु खः। उकिया नितिं बिसिउँ वनाच्चपि सहकारी
संचालकतय् ज्वनेमाः।

खुसि सिथय् थप २० मिटरं ब्वलंकूगु न्ह्यसः



दिलीप शाही “शाण्तिज्जु”

स्वनिगःया नेवाःतय् विस्थापित
याय्त् थीथी कथंया हठकण्डा नालेगु
ज्या जुयाच्चंगु दु। गबलें छु बहानाय्
गबलें गु बहानाय् नेवाःतय् बस्तियात
थःगु पुर्ख्यौली थासं थनाछ्वय्गु कुतः
पञ्चायत कालनिसें न्ह्यानाच्चंगु
खःसा थज्याःगु ज्या बहुदलीय काल
लिपा भन घनिभूत जुयाः वनाच्चंगु
दु। थ्वहे इवल्य् स्वनिगःया थीथी
पुलांगु बस्तीइ लँ चिब्या जूगु धासें
अज्याःगु आपालं नेवाः बस्तीइ
पुरातात्विक महत्वं जाःगु बस्तीयात
ध्वस्त याय्गु ज्या जूगु दु। विशेष
यानाः स्वनिगःया यँया लिसे पुलांगु
बस्तीइ थुकथं जुयाच्चंगु अतिक्रमण
अन्तर्राष्ट्रिय मापदण्ड अःखः खःसां नं
उकियात मखंछु याय्गु ज्या राज्यपाखे
जुयाच्चंगु दु।

दकलय् न्हापां यँया थीथी
सतक चिब्या जूगु धासें तत्कालीन यँ
मेयर केशव स्थापितं कालिमाटीया लँ
तब्याः याःगु खःसा वयां लिपा डा.
बाबुराम भट्टराई प्रधानमन्त्री जुयाच्चंगु
इलय् यँया सतक तब्याः याय्गु ज्या
जुयाच्चंगु दु। अथे ला डा. बाबुराम
भट्टराई थम्हं स्वनिगःया कोर एरिया वा
पुलांगु बस्तीयात गुगुं नं कथंया असर
मलाइ कथं सतक विस्तार यानागु खँ
धकाः स्पष्टिकरण बीगु यानाच्चंगु
दु। नेवाः बस्तीया विकासक्रमयात
स्वय्गु खःसा थ्व वर्तमान सहरीकरण
कथं जूगु मखु धइगु खँ स्वनिगःया
बस्तीयात अध्ययन यानाः स्वःसां
गाः। तर नेपालय् राणाकालं निसें
नेवाःतय् भूमि अतिक्रमण यानाः थःगु
बस्ती व लजगाःपाखे वञ्चित याय्गु
ज्या आः तक नं जुयाच्चंगु दु।

थ्वहे इवल्य् वंगु साउन
महिनाय् सर्वोच्च अदालतं स्वनिगःया
थीथी खुसीया मापदण्ड स्वयां थप
२० मिटर जग्गाय् गुगुं नं कथंया
निर्माण मयाकेत स्वनिगःया थीथी
नगरपालिकायत परमादेश जारी याःगु
दु। सर्वोच्च अदालतया परमादेश
लिपा यँ महानगरपालिकां नं खुसी
सिथय् मापदण्ड स्वयां थप २०
मिटर जग्गाय् गुगुं नं कथंया भौतिक
संरचना निर्माण याय् दइमखु धकाः
सुचं पिकाःगु दु। गुगु सुचंया कारणं
यानाः आम सर्वसाधारण आः थःगु
थातबाथ तकं मदय्का च्वने मालिगु
जक खःला धकाः त्रसित जुइमाःगु
अवस्था ब्वलंगु दु। निश्चित रुपं
स्वनिगःया विकासक्रमयात स्वय्गु
खःसा उकिया थीथी आयाम दु।
मनू च्वनेगु नितिं बिस्कं कथंया थाय्
यात व्यवस्था यानातःगु दुसा मेखे बुँ

ज्या याय्गु नितिं बिस्कं कथंया थाय्
या व्यवस्था यानातःगु दु। अभ
वयां लिपा थीथी कथंया ज्या याय्गु
धकाः मेगु कथं हे बस्ती विकास
यानातःगु दु। तर सरकारय् च्वपिसं
मिखा तिसिना बिउगु कारणं यानाः थौं
स्वनिगः थुलि अव्यवस्थित जुइधुंकूगु
दुकि आः उकियात भिकेगु स्वयां नं
दयाच्चंगु बस्तीयात अभ ध्वस्त याय्गु
ज्या जुयाच्चंगु दु।

निश्चित रुपं स्वनिगःया खुसि
त्यंकेमाः थ्व खँय् बिबाद मदय्फु। तर
आः सर्वोच्च अदालतं गुगु परमादेश
जारी याःगु दु थ्व कथं थप २० मिटर
लागाय् छुं नं कथंया भौतिक संरचना
निर्माण याय् मदइगु अवस्थाय् उगु जग्गा
थुवाःयात गुलि मार लाइ धइगु न्ह्यसः
थन ब्वलनाच्चंगु दु। थौंया अवस्थाय्
खुसि सिथय् सरकारी मापदण्ड कथं
त्वःतेमाःगु जग्गा त्वःताः थीथी भौतिक
संरचना निर्माण जुइधुंकूगु दु। मेता खँ
स्थानीय निकायपाखे नक्सा पास यानाः
दय्केगु ज्या न्ह्यानाच्चंगु आपालं

अज्याःगु जग्गाय् क्षतिपूर्ति बीमाः। तर
खुसि सिथया द्वलंदः जग्गाया क्षतिपूर्ति
बीगु औकात सरकारया दु कि मदु ?
धइगु न्ह्यसः नं थन ब्वलनाच्चंगु दु।

खय्त ला सरकारं
सर्वोच्च अदालतया परमादेशयात
कयाः पुनरावलोक याय्गु खँ धाःगु
दु। उकिया नितिं याकनं हे प्रक्रिया
न्ह्याकेगु खँ नं सरकारं धाःगु दु।
पुनरावलोकया इवल्य् सरकारं खुसि
सिथय् जग्गा सर्वोच्चया मापदण्ड कथं
अधिग्रहण याय्गु खःसा उकिया नितिं
सरकारयाके ध्यबा मदुगु तर्क यानाच्चंगु
दु। उकथं हे सरकारं याःगु मेगु तर्क
धइगु सर्वोच्च अदालतया परमादेश
कथं खुसिया निखेरं थप २० मिटर
थाय् खालि याय्गु खःसा पशुपति
निसें गोकर्ण तकया खुसि सिथय् च्वंगु
आपालं देगः थुनेमालिगु अवस्था वइगु
व थुकिं यानाः आम सर्वसाधारण
जनताया धार्मिक आस्थाय् तर्क
आघात लाय्फइगु खँ धयाच्चंगु दु।
स्वनिगःया आपालं खुसि सिथय्



नक्सा पास जुइधुंकूगु जग्गाय् छँ दने मदइगु खःसा आः
नगरपालिकां बियातःगु नक्सा छु याय्गु ? उकिया औचित्य छु
जुइ ? अठ्ठ गुलिखें अवस्थाय् थः मस्तय्त ब्वंकेत वा छँजःया
विरामीयात वासः याय्गु नितिं थप २० मिटर दुने लाःगु जग्गा
धितो तयाः कयातःगु जग्गा आः छु जुइ।

भौतिक संरचना यँ मनपाया सुचं वा
धाय् सर्वोच्च अदालतया परमादेशया
कारण दय्केगु ज्या क्वचाय्के मफइगु
अवस्था ब्वलंगु दु। नक्सा पास
जुइधुंकूगु जग्गाय् छँ दने मदइगु खःसा
आः नगरपालिकां बियातःगु नक्सा छु
याय्गु ? उकिया औचित्य छु जुइ ?
अभ गुलिखें अवस्थाय् थः मस्तय्त
ब्वंकेत वा छँजःया विरामीयात वासः
याय्गु नितिं थप २० मिटर दुने लाःगु
जग्गा धितो तयाः कयातःगु जग्गा आः
छु जुइ। यँ महानगरपालिकाया सुचं
लिपा थीथी बैंक अज्याःगु जग्गा धितो
तयातःगु मगाः धासें थप मेगु अलच
सम्पत्ति धितो तयेमाल धकाः बैंकतय्सं
दबाब बियाच्चंगु खँ नं वयाच्चंगु
दु। थज्याःगु अवस्थाय् मेथाय् जग्गा
मदुपिनिगु हकय् आः छु जुइ। खः
थुकथं थीथी न्ह्यसः ब्वलनाच्चंगु दु।
गुकियात निराकरण याय्गु दायित्व
राज्यया खः। छाय् धाःसा सर्वोच्च
अदालतं परमादेश जारी याय्गु इवल्य्
उगु परमादेशया लिसे छता खँ धयातःगु
दु। यदि सुयां नं जग्गा अधिग्रहण याय्
माःगु अवस्था वल धाःसा सरकारं

द्वलंदः दँ न्ह्यवनिसें देगःत दुगु खः।
अले अज्याःगु देगः प्रति विशेष यानाः
नेवाः समुदायया बिस्कं आत्मियता
दु। अभ नेवाःतय् गुलिखे संस्कार
अज्याःगु देगल्य् याय्माः। तर आः
थ्व देगःत थुनेगु धइगु छगू कथं नेवाः
सम्पदायात ध्वस्त याय्गु हे खः।

मेता खँ धइगु सर्वोच्च अदालतं
गुगु परमादेश जारी याःगु दु। उकियात
कयाः नं थीथी न्ह्यसः ब्वलंगु दु।
खः सर्वोच्च अदालतं खुसि बचे
गुगु परमादेश जारी याःगु दु। लिसे
लिसे खुसी सिथय् थप विस्तार याय्
त्यंगु थासय् गुलि मनूत बसोबास
यानाच्चन धइगु बारे मखंछु याःगु
खनेदु। उकथं हे अज्याःगु बस्तीइ
च्वनाच्चपिं जनताया बसोबासया
अधिकारयात बेवास्ता याःगु जक खः
ला धइगु न्ह्यसः ब्वलनाच्चंगु दु।
सर्वोच्च अदालतं याइगु गुगुं नं निर्णय
धइगु आम सर्वसाधारण हितया नितिं
जुइमाः धइगु अन्तर्राष्ट्रिय मान्यता
दु। तर सर्वोच्च अदालतया परमादेशं
अज्याःगु मान्यतायात हाचां गाःगु जक
मदुला धइगु न्ह्यसः ब्वलनाच्चंगु दु।

बौया ख्वाः स्वय् : बौ कःघाय्

प्रा. सुवर्ण शाक्य

“
थौंकन्हय् ब्वनेकुथिइ
नं ममतामयी सन्तुलित
पारिवारिक जीवनया
व्यवहारया सँ स्यनीगु
मखसे थःथःगु
ब्वनेकुथिया नां तय्त
प्रतिष्ठा जोगय् चाय्
कथं मस्तय् परीक्षा
परिणामय् डिस्टिंक्सन
वयेके माथंया स्यनेकने
यायगुली जोड बीगु ।
सामाजिक संस्कार,
कुलाचार व्यवहार
धैगु मस्तसँ मचांनिसँ
थःगु समाजय् च्वनाः
स्यना काइगु खः
थःगु पनया अभ्यास
स्वतः जुयावनीगु
खः । मचातय् सही
तौर तरिकाया व्यवहार
कनेसाथ मांअबुं सचय्
याकाः मस्त कःघाइगु
खः । अथे मां अबुं मस्त
कःघाय्कथंया सँत थौं
मजुयावनाच्चवंगु दु ।

नेपालय् संस्कार संस्कृतिइ जन्मनिसें मृत्यु तकय् मनुया स्वअस्तित्व व गुण स्मृतिया लागि अनेक पर्व न्ह्याकाच्वंगु दु । बौया ख्वाः स्वयगु छगू पर्व खः । पर्व धैगु धर्म कार्य वा उत्सव आदि यायगु पुण्य दिन, विशिष्ट दिन व अवसर खः । भीथाय् अनेक पर्वत कुलकुलि दु । न्हिन्हं ख्वाः स्वयाः खँ लहानाच्वनामह अबुया ख्वाः स्वयगु धकाः विशेष दिन क्वःछिनाः अबुया मर्यादा कायम यानातःगु खः । तिथि कथं भाद्र कृष्ण औंसीयात थ्व दिन नालातःगु दु । बौयात मर्यादा व गुण कथं आकाश समान धैतःगु दु । काय् म्हाय् या संरक्षणया जिम्मा अबुं कयाः इमित ब्वलंकी इमित जीवनय् भिंगु लँपुइ न्ह्याकी । अबुया सन्तुष्टियात चिरस्थायी कथंया सम्मानया भावना जागृत यायगु हे थ्व पर्वया पवित्र ध्येय खः । काय् म्हाय् मस्त व बौया दथुइ मतिना, सद्भावना व ममताया सुखानुभूत ज्वीगु स्वभाविकता कथं थ्व पर्व सृजना जगू खः । अबु जन्मदाता जक मखु कर्तव्यनिष्ठताया प्रतिमूर्ति नं खः ।

थ्व दिं कुन्हु अबुया जीवन गुजाराया नितिं माःगु वस्तु पुरे यानाः मचाः मगाःगुलिं ज्वीगु समस्यां मुक्त लिपाया क्लेशं जाःगु खायूगु खँत तंकेगु कथंया थ्व ई खः । ईब्यः थथ्याः क्वथ्याः जुयाः थौकन्ह्यू थ्व पर्वयु श्रद्धां मखु औपचारिकता पूर्वके कथं बौया ख्वाः स्वयेगु धकाः हनीपिं नं अप्चया वःगु दु । अबुया पालिं भ्वपुयाः शारीरिक, मानसिक, आध्यात्मिक खँ शुद्रकाः बौया ख्वाः स्वयंगुलिं रहश्य दु धकाः धैच्वनेगु ई मखुला धैथें थौ जुयावःगु दु ।

मस्त्युसं पालि भव्वीगु चलन
मदय् धुंकल। अबुयात धन्यवाद
व त्जबलप थयग मबम धकाः
आशिर्वादया लिसः बीपिं दय्धुंकल।
शौकन्हय् संस्कृति धकाः परम्परा
जक धाने याईपिं अप्वया वंगु दु।
परम्परा धकाः माःगु माछि खँयात
त्वःताः ई ब्यकथं मल्बय् धुंकूगु
खँयात प्रोत्साहित यानाः अनावश्यक
भ्वासिपहः क्यनाच्चंगुलिं सभ्यताया
खँय् हे हास्यास्पद जुयाच्चंगु दु।
संस्कृतिया मौलिकताय् हे लिच्चः
लाइकथं व्यवहार खने दयाच्चंगु
दु। संस्कृति मनूया आचरणया जग
खः, समाजगत, जातिगत, राष्ट्रगत
पहिचान खः। परम्परा धाःगु भिंगु ज्या

त्वःतेमते, कुलवंश नाश याये मते धाःगु
खः । थौकन्हय् परम्पराया खँत क्यनेत,
ब्वयूत, म्हिते थें न्ह्याइपुकेगु जक
जुयाः भिंगु उद्देश्य प्रतिया हार्दिकता



म्हो जुयाः वनाच्च्वंगु दु ।

परम्परा व संस्कृति धका: म्हुतुइ
जक दनि । यायूमा:गु धाथेया व्यवहार
पाना: वनाच्चंगु दु। पुस्तान्तरित
यायूमा:पिं भविष्यया कर्णधार मस्त
पारिवारिक स्नेह व ममतां हे तापाइ
कथंया चलन वैच्चंगु दु। मचानिसें
दे केयर सेन्टरय् तय्गु। होस्टलय्,
बोर्डिङ्गय् तय्गु। विदेशय् ब्वंके छ्
वय्गु व ज्या याके छ्वय्गु जुल कि थ:
सन्तानयात थ:पिंगु परम्परा संस्कारय्
गुबलय् तय्गु स्यने कने थ्वीकेगु याना:
व्यवहारय् गुबलय् तय्गु ? मचानिसें हे
मां अनुनाप तापाना: नय्, त्वने, ब्वने
व्यवहारय् मच्चंसेंलि मां अबु प्रतिया
स्नेह, ममता व श्रद्धाया व्यवहार गुकथं
क्वातुइ ? मस्तयत् ब्वलंके कथं
बौपिनि हे आशय व स्वभाव पासेलि
मचायाके कूलछँया सांस्कृतिक परम्परा
व हसिबसिया छँ ला स्वत: हे त्व:फीगु
जुल ।

थौकन्हय् ब्वनेकुथिइ नं
ममतामयी सन्तुलित पारिवारिक
जीवनया व्यवहारया खँ स्यनीगु
मखुसे थःथुगु ब्वनेकुथिया नां तय्त
प्रतिष्ठा जोगय् याय्कथं मस्तय्
परीक्षा परिणामय् डिस्टिन्क्सन वय्के
माःकथंया स्यनेकने याय्गुलि बः
बीगु । सामाजिक संस्कार, कुलाचार
व्यवहार धैगु मस्तसें मचानिसें थःगु
समाजय् च्वनाः स्यना काइगु खः ।
थःगु पनया अभ्यास स्वतः जुयावनीगु
खः । मचातय् सही तौर तरिकाया
व्यवहार कने साथ मां अबुं सचेत
याकाः मस्त कःघाइगु खः । अथे मां
अबुं मस्त कःघाय् कथंया व्यवहार थौं
ज्याच्चंगु मदु ।

मस्तसें मचांनिसें अबु नापया

सम्बन्ध व व्यवहारया खँ न्यने स्यने
मदुगुलिं मस्त थःपिनि पपू बुल कि
थःथम्हं ब्वैवनीगु । कलाः व्याः यानाः
मचाखाचात दत धायुव अबुयात हे

पंगः ताय्कीगु । उकीसनं बौ भचा
ज्याथः जुल कि वृद्धाश्रमय् वाय्
यंकीगु । अबु ज्वी धुंकूह थमं
कतिलाःपाकः व्यवहार यानाः अबुयात
पन्थय् याइगु खँय् चलाख जुयागु धकाः
च्वनीगु । लिपा थमं थः अबुयात
यानार्थे थःपिन काय्पिनिपाखे अथे
हे दुःख भोगय् याय्मानि धकाः भ्याः
हे बिचाः मयासे बुभ्कवड जुयाः
धुक च्वनीगु । बौयाः खाः स्वय्गु
अबु म्वानाच्चबलय् जीवितावस्थाय्
वैगु गुणया अनुमोदन याय्गुकथं
आज्ञापालन याय्गु खँ लुमंकेगु खः ।
थ्व परंपरायात कजय् याय्गु खः ।
सांस्कृतिक परंपरा कथं नं अबुयात
अग्रप्रीकइ तःगु खः । मस्तसें थःपिं नं
अबु ज्वीगु भागीदार खः धकाः थःम्ह
अबुयात आकाश समान धाःगु खँ
थ्वीका वनेगु खः ।

शौकन्हय् आस्थाय विषय्य्
खँ ल्हाय्बल्य् अबु नं फर्मल
(औपचारिक) थें जुयाः वनाच्चंगु
खनेदु । कार्यापनिगु दथुइ अंशवन्दाय्
पक्षपात यात धकाः अले थःगु सुरक्षाय्
अप्वः सम्पत्ति काल धकाः अबु खनाः
तंचायाः अबुया ख्वाः हे मस्वैपिं दु ।
अबु मदैबल्य् मितकं मतैपिं व श्राद्ध
तकं मयाइपिं दु । धर्मपुत्र धकाः
लहिनातःपिसं नं अबुया ख्वाःस्वैपिं नं
दु । टेष्टट्यूबं बूपिं मस्तय् थःत जन्म
जुइत बीज ब्यूम्ह मनू अबु मजुसे मांया
भाःत अबु जुयाच्चंगु दु । मचां अबु
धकाः वैत हे ख्वाः स्वैगु खः । मामं
अबुया नां मकँसे तःपिं मस्तय् अबुया
ख्वाः हे स्वय् म्वाःगु नं दु ।

बौया ख्वाः स्वयूगु पर्व दिं कुन्हु
अबु मदय् धुंकूपिं काय् म्हायिपसं
तीर्थय् श्राद्ध यानाः बाय् छैय् च्वनाः

श्राद्ध यानाः बाय् पुरोहितयात सिदा
दान बियाः जूसां अबुयात लुमंकाः
ख्वाः स्वय् विधि हनेगु याइ । भी
थाय्या पिनि गोकर्ण तीर्थय् वनाः
श्रद्धाञ्जली बी । अन उत्तरवाहिनी
खुसिइ म्वःल्हुयाः गोकर्णेश्वर, पार्वती
व गदाधर दर्शन याइगु खः । थये याइगु
पितृ तर्पणया लागि खः । गोकर्णेश्वरय्
भगवानया मूर्ति व विष्णुपादका नं
दु । मदय् धुकूपिनिगु दछिइ छकः
श्राद्ध याइगु धैगु मदुम्हेसित न्हि न्हि
लुमंके कथं खः छायाक मन्थ्या दछि,
पितृतय् न्हिछि धाइ । थ्व बौया ख्वाः
स्वय्गु पर्व दिनयात कुशेऔसी नं
धाइ । जालन्धरया सतीम्ह कलाः
“वृन्दा” यात विष्णुया मायारूपं सतित्व
लुटय् याना ब्यूगलिं वृन्दां विष्णुयात
घाँय् ज्वीमा धकाः सराः ब्यूगलिं
विष्णु कुश घाँय् जूगु धकाः कुशया
विशेषता व वया नाप स्वापू दुगु पुराण
व किवदन्तीत आपालं दु ।

बौया ख्वा: स्वयूग पर्व
गुणानुस्मरण दिवस ख: । कृतज्ञताया
दिवस ख: । मनूत भावना, धारणा व
पाक्ष्नायू जीवन हनाच्चंगु ज्वीगु ख: ।
धर्मशास्त्र व जीवन भवचक्रया खँ कथं
मनूया पुनर्जन्म ज्वीगु खँयू सित धायूव
शरीर हिलीगु ख: । सीम्हसिगु म्ह
जन्मपतिं कीट, पतंग पशुपिछि न्ह्याम्ह
जुजुं वनेफु । थुकथं दक्व प्राणीत अबु
ज्वी फुगु धैथें ज्वी । पुनर्जन्म कथं
जन्मपतिकं छगू हे रुप काल ज्वी
धैगु सीमखु । उकिं मडुम्हं गुगु स्वरुपयू
त्वःतूगु ख: वहे रुप न्ह्याबलें लुमंके
भनं थथे बौया ख्वा: स्वयूग आदि
मनूया थःया अस्तित्वया खँ जुयाच्चंगु
धका: धायूथायू छिं ।

२१ औ शताब्दी धका: थाय्वाय्
अवस्था व्यवस्थाया विचा: मयासे
ह्यूपा:या खँ हालाज्वीगु थुगु इलय्
भीथाय् थें या:गु म्हुतुइ हे संस्कृति
परम्परा धका: हालाज्वीगु थासय्
नं अबु जून्हीसिनं मस्त कताय्फेगु ई
मखेंवंगु व कताय्गु वातावरण नं त्व:ता
वंगुलिं थुज्व:गु बौया ख्वा: स्वयगु
थेंज्या:गु संस्कार संस्कृति, परम्परा व
गर्व ख: धका: ल्यंकेगु ख:सा समाजं
हे बौं जूपित व बौया संस्काया थीं
तकया अवस्थ क:घाय्गु मा:गु जुल ।
धाथेंया 'पु' नामगु नरकं अबुयात बचे
याइम्ह "पुत्र" ख: धका: शास्त्रय् धैत:
कथं उज्व:पिं भद्रपिं काय्मस्तसैं "बौ"
खँया हे स्वत्वया लागिं देश समाजय् हे
क:घाय्मा:गु थौया अवस्था ज्व:गु दु ।



राम प्रजापति
प्रोप्राइटर

हारती मिठाई भण्डार

(शुद्ध शाकाहारी)

कालिमाटी चोक, टंकेश्वर मार्ग, काठमाडौं ।
फोन नं. : ०१-५३७२९९९, मो. ९८०३९८०६९९

यहाँ:-

विवाह, व्रतबन्ध, पार्टी, पिकनिक, तथा अन्य शुभ कार्यको लागि अर्डर अनुसार मिठाईहरू तयार गरिन्छ ।

[illegible]





बाया नामय् पौ



रेखा शाक्य (राजमति)

यः बा
जितः छ लुमं थें
छ नं जि लुमःनिला थें ?
छ सुखावति भुवनय् वंगु
न्हि, छावाः, ला, दच्छि, निदैं धाधां
पात्रया ल्याःचालं भिदैं क्यनिन
बा खँवल्य दुसुनाच्वंगु महिमा मखा
यःबा धकाः सःतेगु प्याःचाः मर्तिन अभं

यःबा
नखःचखः जात्रा पर्व वइ
छ न्हिथं सिबें भन लुमनावइ
मुसुं न्हिलाच्वंगु छंगु किपाः अगल्य
मायां तीजक छन्त थिइ जिं न्यताल्य
जिगु नुगः ह्वाँय्ह्वाँय् खवइ भन उबलय्
छंगु विवशता, जितः मायां पितुपिइ मफइबलय्

यः बा
मां छन्त लुमंकाः, म्हगसय् म्हाकाः अभं खःनि
ख्वीन्यादैया त्यपुजीवन लुमंका त्वलंह च्वच्वनि
क्वातुगु छिमिगु सतुबतु समान व त्यपू मतिना
छं त्वःताः वनेधुंकूगु खःसां ल्यनाच्वन व सतिना
छ मदुगुया ह्याकिं मां या जीवनय् सदां ल्यन
अयूनं नुगः तयेत जिमिगु न्ह्यःने न्हिला क्यन

यःबा,
थौं ला बाया खाः स्वयेगु दिं
जितः ला लुमंलुमं ख्वये जक व
छ मदुसां छं काय् म्हायाय्पिं वइतिनी
मांया ख्वालय् छंगु खां लुइकाः स्वइतिनी
तर, न्ह्याबले थें
यःगु बेसनया लड्डु धाधां छं म्हुतुइ तइमखुत
यःगु हँय् खँ धाःधाः खँय्वःपाः छं वां न्याइमखुत



जि यःम्ह बा
भिदैं दुनेया दक्वं खँ छन्त कनेमास्ति व
छंगु नामय् जीवनया बारखँ च्वयेमास्ति व
छ वन, थःगु भुवनय्, न्हापा थें छुं मजुल
छ थें मांया लिधँसा सखे जि जुइ मसल
उकिं छन्त लुमंकाः मां खवइ इलय्ब्यलय्
गुकथं ह्येके मांयात म्हगसय् वया धालय्
यःबा
छं स्यू ला मां या न्हापांगु जंक्वःया व दिं
छ नं नापं दुगु खःसा गुलि न्हइपुइगु न्हि
सुखया इलय् नं सहःयायेमफुगु दुखया व ई
हिकुहिकु लना ख्वयागु छ लुमना मां व जि
भः भः धाम्ह मां या लिक्क खतय् छन्त खंकाः
स्याः नुगलय् छंगु मतिनाया मलहम तीजक पाका

यःबा,
काय् समान ब्वलंकल
जितः मर्चानिसें
कर्तब्य पूर्वकाः च्वना थःम्ह फू चाः थें
थौं थुल जिं छंगु व संघर्ष व बलिदान
छं कयंगु लैपुइ न्ह्याकेवं जिं अभियान
जि न्ह्यानाच्वना निरन्तर व हे लपुँइ
बस, छंगु सुवाः दु जितः धैथें मतिइ

खः छं त्वःताः वंगु भिदैं क्यनि न
यः बाः धायेगु प्याःचा तंकेमफुनि
किपाः स्वयाः सःतेगु त्वःमफिकानि
छंगु गुण गुबले ल्वःमंकागु मदुनि

बा खः व



अञ्जना ताम्राकार



खः नुगः वया नइक्या थें थः मस्तय् निर्ति
छाः स्वःसा पिन्य नुगः अले नायु दुन्य अति
चिन्ता मस्तय् भबिष्यया कया जुइवं न्हिछं
मस्तय् खुसि हें वासः वयागु लय्ताःया निर्ति
खः व बा

मखु केनी घाः नुगःया तइ सुचुका नुगःया हे तुन्थि
वःसां सू दुःख कथं स्वयाः सर्ग ख्वइ नुनां ख्वबि
नां मस्तय् स्वयाः थःगु जाय्मा मनसुवा तथा च्वनी
जुयाः लैजुवाः मस्तय् वं लैय् बांलाःगु वनेत स्यनि
खः व बा

यच्चुकी थें साला फोहर लखय् फितकिरीं
याइ कुतः जीवन मस्तय् यच्चुकेया निर्ति
मतिना मतः मस्तय् निर्ति नुगलय् च्याका च्वनी
ज्वनाः ल्हाःनापं सुइ नं थें घडि मू ईया क्यना च्वनी
खः व बा

च्वनि न्ह्याना सागरं थें घय्पुनाः फुक खुसि
दुःख सुखय् जुया तिबः थें न्ह्याका छँ च्वनी
सागरय् मदिक वइ थें लबु च्वनी चुला ल्हातुति
मधासे न्ह्याःम्हां चाःन्हि च्वनि हायेका हिचाति
खः व बा

मस्तय् जीवन क्यबय् बांबांलाःगु स्वां वा गात कि
नुगः वया नसंचा ईया सिरसिर फसं थे सिच्चुकी
छँया पौ थें खः व मस्तय् सान मानया तपुलि
मांबौ दुगु छँ सदां सूर्यः व मिला दुगु सर्गः थें थी
व हे खः बा

थौं दिं बाया दिं



सुधीर ख्वबि

ज्या सुथां लाइगु बेलाय्
ज्या भज्यंक स्यनिगु इलय्
ज्या तसकं थाकुइ बलय् नं
पुलुक्क स्वःवइ, जिमि बानं
जितः भलसा बीतः
जिगु नुगलय् दुहां वइ ।

गुबले लुमन्तिया स्वां जुयाः
गुबले आज्जुया म्हगस लुयाः

गुबले फय्या थिया जुया
गुबले मिखाय् ख्वबि बुया
गुबले म्हुतुसिया मुसुकाः ह्वयाः
वया हे च्वनी इलय् ब्यलय्
जिमि बा भलसा जुयाः ।

तर
थौंया न्हिसं जिमि बा
सुथानिसें जि नाप नापं दु
जिगु पलाः नाप नापं
जिगु किचः जुयाः
न्हिच्छं जि नापं हे जुइ
अलय् चच्छि नं
जिनापं हे च्वनी जुइ
छायेकी, ?
थौं बायाँ न्हिं खः
बायात लुमंकाः
थःगु नुगः नं ख्वइगु न्हिं खः ।

चिबाखं



रिता महर्जन “ऋतु”

“नालायक, पाजी छन्त ला काय्
धाये नं मछालापुसे च्वनेधुंकल । छिमि
दाजुकिजा, तःकेहींपिं फुक उलिमछि
आखः ब्वनाः अमेरिका, कयानाडा,
यू.के. वनाः च्वं वनेधुंकल । इलय्
आखः बालाक ब्वं धयां खँ मन्यं
कुलंगार । छंगु चिन्ता काकां छिमि
मामं नं थ्व संसार त्वःतावना आखः
ब्वना मतःम्ह धकाः सुनां भम्चा नं
मब्यू छं ला जि थें जाःम्ह थपाय्धंम्ह
वकिलया नं न्हाय् त्वथुला बिल ।”
थथे भनं रिटायर्ड जुइधुंकुम्ह

नालायकम्ह काय्

वकिल बासुलाल थः दातिम्ह काय्
पुनितयात ब्वः बियाच्वना बासुलालया
थः काय् भौ, म्हायाय्, जिलार्ज, छय्पिं
सकले मेगु ततःधंगु देशय् आः उपिं सुं
नं थन लिहां वै मखुत । उके थः मस्त
सुथां लाःगु खनाः बासुलाल तसकं
लय्ताः ।



थम्हं कमय् याये फक्व यानाः
सकले थः मस्तय् उतिं खनाः थःके
दुगु सम्पत्ति फुकाः सकले मस्तय्
पिने देशय् छ्वयाः अन हे च्वनेगु तकं
ब्यवस्था यानाबिला थः अबु लुमंकाः
बासुलालया काय् म्हायाय्पिन्सं नं
इलय् ब्यलय् फोन यानाहै । उब्लय्
बासुलालया लसता अन तये थन तये
दै मखु ।

ई न्ह्याब्लें उथें गन जुइ ! छन्हु
बासुलालया प्रेसर व सुगर हाई जुयाः
स्वाहानेय् इकुयाः स्वाहानं कुतुवन ।
बासुलाल अन हे बेहोस जुयाच्वन ।
गुलि ई लिपा पुनित छैय् थ्यंकः
वल । थः अबु स्वाहानेय् बेहोस
जुयाच्वंगु खनाः जःलाखःलात सःताः
काचाकाचां अस्पताल ब्वाकल ।

अस्पताल यंकाः डाक्टरं वासः
यासेलि बासुलाल होसय् वल । थम्हं
कुलंगार धकाः ब्वः बियाम्ह कार्य थःगु
ज्यान म्वाकाबिल । पलख लिपा देशं
पिने च्वपिं मेपिं मस्तय् स थः अबुया
च्यूताः कयाः धमाधम फोन यानाहल ।
तःधिकःम्ह कार्य पुनितयात ब्वः बिल ।
“कुलंगार, छं अबु छम्हेसित बालाक
स्वये म्वाः ला ? का स्व, छु जुल
अबुयात” धाधां फोनय् हालाहल ।
पुनित न्व मवासे सुम्क च्वनाच्वन ।
बासुलाल थः दातिम्ह काय् यात स्वल,
अथें मिखां ख्वबि हायेकल अले फोन
अफ यानाबिल ।

केन्द्रीय मानन्धर संघया धा:बाजं ब्वज्या



लहना वा:पौ/ केन्द्रीय मानन्धर संघया ग्वसालय् यै महानगरपालिकाया लागत साभेदारी प्यक्व:गु धा:बाजं ब्वज्या वंगु शनिवा: यैया मरुइ माजु देगलय् त:जिक जुल। यैया थँहिंति मानन्धर गुथि, पाक्व पुखूद्यां सना: खल:, न्याग:मणि फेदी मानन्धर संघ, दैसा: त्वा: मानन्धर समाज, चसांद्र मानन्धर सना:गू खल:, लाय्कूसा: मानन्धर समाज व भिंघ: गुथि कालिमाटी याना: सछिम्ह मल्याक कलाकारतय्सं मंका: कथं धा:बाजं न्ह्यब्व:गु ब्वज्याया

उलेज्या यै महानगरपालिकाया उपप्रमुख सुनिता डंगोलं यानादीगु ख:।

ज्याइवलय् न्ववाय्गु इवलय् मू पाहां डंगोलं देय्या हे केन्द्रविन्दु जुयाच्चंगु हनुमानध्वाखा लागाय् बाजं ब्वज्या: याय्गु गुगु ज्या जुल थुकिं सायुमितय्गु म्हसिका ब्वय्गु ज्या जूगु खँ धयादीगु दु। लिसे वय्कलं थुगुसि राजनीतिक कारणं याना: मानन्धर संघयात बजेट मवंगु खँ कनादिसैं बजेट मबिल धका: च्वेनेगु स्वयां बजेट छाय् मवल धइगु खँय् ध्यान बीमा:गु

खँ धयादीगु दु। लिसे वय्कलं बजेट मला:गु राजनीतिक कारण जुइफु धासैं आ: नं थ:पिसं बजेट गुकथं बीगु धइगु बारे सोचे यानाच्च्वनागु खँ नं धयादीगु दु। वय्कलं धयादिल, 'बजेट सरकारं बीगु मखु, स्थानीय निकायं स्थानीय जनतायाके म्हायात:गु बजेट हे बीगु ख:। यदि मबिल धा:सा उकिया नितिं दबाब बीगु ज्या स्थानीय जनतां याय् मा:।' उकथं हे वय्कलं स्थानीय जनतायात बेवास्ता याना: वइगु गुगुं नं कथंया बजेट स्थानीय जनतायात नितिं स्वीकार्य मजुइ खँ धासैं धयादिल, 'बजेट मव:गु खँय् मेपिं मखु, भी हे सचेत जुइमा:, थ्व बजेट सुनां नं थ:गु खलिं बीगु ध्यबा मखु, भीसं हे पुलातइगु राजश्वं हे भीगु अधिकार ख: धका: थुइकमा।' ज्याइवलय् यै महानगरपालिकाया प्रवक्ता नापं १७ वडाया अध्यक्ष नविन मानन्धर भायादीगु व शाल्दुल गुल्मया प्रमुख अनिल श्रेष्ठपिसं नं थ:थ:गु नुग: खँ तयादीगु ख:।

भिक्षुयात आक्रमण जूगु खँय् गृहमन्त्रीया ध्यानाकर्षण



लहना वा:पौ/ गृहमन्त्री रमेश लेखकयात बौद्ध युवा कमिटी यलं नेपाल संघ महानायक भिक्षु गुणघोष महास्थविरयात आक्रमण या:गु खँयात कया: ध्यानाकर्षण या:गु दु। बौद्ध युवा कमिटीया ध्यानाकर्षण लिपा गृहमन्त्री लेखक संघ महानायक भिक्षु गुणघोष महास्थविरयात आक्रमण यागु घटनायात कया: बुभे याय्त नेपाल प्रहरीयात निर्देशन ब्यूगु दु।

'बुद्ध जन्मभूमी नेपालय् बुद्धधर्मया विकासय् समर्पित भिक्षुयात आक्रमण जूगु तसक दु:खदायी घटना ख:' गृहमन्त्री लेखकं धयादिल। लिसे वय्कलं प्रहरी महानिरीक्षक वसन्त कुँवरयात फोन याना: घटनाया बिफ्रिड यायेत निर्देशन नं बियादीगु दु।

गृहमन्त्रीयात ध्यानाकर्षण याय्गु इवलय् कमिटीया उपाध्यक्ष सुर्देशन शाक्यं ध्यानाकर्षण पौ ब्वना: न्यकादीगु ख:सा कमिटीया अध्यक्ष सतिश शाक्यं गृहमन्त्री लेखकयात ध्यानाकर्षण पौ ल:ल्हागु ख:। ज्ञापन

पौ बीगु ज्याइवलय् बुद्ध विहारया प्रमुख भिक्षु कौण्डन्य लगायत थीथी बौद्ध संघसंस्थाया प्रतिनिधिपनिगु उपस्थिति दुगु ख:।

थ्वहे इवलय् राष्ट्रियसभाया दुज: डा. अन्जान शाक्यं गुणघोष महास्थवीरयात जूगु आक्रमण याम्हेसित कारवाही यायेगु माग यानादीगु दु। राष्ट्रिय सभाय् न्ववाय्गु इवलय् वय्कलं दोषीयात कारवाही यायेत सरकारयात माग यानादीगु ख:। वय्कलं बौद्ध भिक्षु गुणघोष महास्थवीरयात सुनियोजित रुपं आक्रमण याना: लुटपाट या:गु धासैं आक्रमण कूकर्मया क्रूर रुप ख: धयादिल। उकथं हे वय्कलं आक्रमण या:पिंत क्रूर अपराधी जूगु संज्ञा बियादीगु दु।

डा. शाक्यं बौद्ध भिक्षु भन्तेपिनिगु सुरक्षाया माग यासैं बौद्ध विहारय् नं सरकारपाखें सुरक्षाया व्यवस्था यायेमा: धासैं घा:पा: जुया: बिज्या:म्ह भन्ते गुणघोष महास्थवीरया स्वास्थ्य लाभया कामना नं यानादीगु दु।

प्रेमशान्ति तुलाधरयात बैकुण्ठ लाकौल सिरपा:

लहना वा:पौ/ नेपालभाषा साहित्य व समाचोलना विधाय महत्वपूर्ण योगदान यानादीम्ह प्रेमशान्ति तुलाधरयात बागमती प्रदेशया सामाजिक विकास मन्त्री हरिप्रभा श्रेष्ठ खड्गीं बैकुण्ठ लाकौल सिरपा: ल: ल्हा:गु दु। उकथं हे मन्त्री श्रेष्ठ नेपालभाषा केन्द्रीय विभागय् मिसा विद्यार्थीतय्त प्रोत्साहनया नितिं स्वनात:गु चैन लाकौल सिरपा: स्वम्हेसित ल:ल्हा:गु दु। नेपालभाषा स्नाकोत्तरय् दकलय् अप्व: ल्या: हया: उत्तीर्ण जूपिं विद्यार्थीपिं कृष्णप्यारी श्रेष्ठ, पद्मा खयरगोली व रजनी श्रेष्ठयात चैन लाकौल सिरपा: ल:ल्हा:गु ख:।

सिरपा: ल:ल्हाय्गु ज्याइवलय् न्ववाय्गु इवलय् मन्त्री श्रेष्ठ नेपालभाषा, साहित्य व संस्कृति ल्यंकेगु ख:सा उकियात पुस्तान्तरण यायेमा:गु खँ नं धयादीगु दु। वंगु शुक्रवा: नेपालभाषा केन्द्रीय विभागया ५४ क्व:गु बुदिं लिसें लाकौल व चैन लाकौल सिरपा: ल:ल्हायेगु ज्याइवलय् मूपाहां कथं



न्ववासें वय्कलं उगु खँ धयादीगु ख:।

नेपालभाषा केन्द्रीय विभाग प्रमुख डा. सहप्रा. राजनलाल जोशीया सभापतित्वय् जूगु ज्याइवलय् लसकुस यायेगु इवलय् प्रमुख जोशीं नेपालभाषा केन्द्रीय विभागय् थीथी कथंया अनुसन्धान जुयाच्चंगु लिसे बागमती प्रदेश नेपालभाषा व तामाङ भाषायात सरकारी ज्याखँया भाय् दयेकेधुंका: भाषा अनुवादया नितिं जनशक्ति मा:गु ख:सा थ:पिसं मा:गु ग्वाहालि यायेत तयार दुगु खँ धयादीगु दु।

ज्याइवलय् सिरपा:या दाता

बैकुण्ठप्रसाद लाकौलाया काय् भाजु श्रीकण्ठ लाकौलं बैकुण्ठ लाकौल सिरपा: व चैन लाकौला सिरपा:या नितिं अक्षष कोषया व्यवस्था यानागु जानकारी बियादीगु ख:।

ज्याइवलय् नेपालभाषा केन्द्रीय विभागया संस्थापक प्रमुख प्रा.डा. सुन्दरकृष्ण जोशी, पाटन क्याम्पसया प्रमुख डा. लक्ष्मणसिंह कुँवर व सिरपा: त्याकादीम्ह प्रेमशान्ति तुलाधरं नं न्ववानादीगु ख:सा उप प्रा. जीवनकुमार महर्जनं तुलाधरया म्हासीका न्ह्यब्वयादीगु ख:।

देशभक्ततय्गु मोर्चा मा: : डा. महेशमान श्रेष्ठ



लहना वा:पौ/नागरिक न्ह्यलुवा: डा. महेश मान श्रेष्ठ देशभक्ततय्गु मंका: मोर्चा दयकेमा:गु खँय् ब: बियादीगु दु। वय्कलं नेपाली काँग्रेस, नेकपा एमाले, माओवादी, समाजवादी लगायतया मंका: मोर्चा थौं मदय्क

मगाय्धुंकूगु खँ धयादीगु दु।

नेवा: ग्वाहालि पुच: तोखाय् जूगु ज्याइवलय् वय्कलं नेपा:या राजनीतिक दल हे भ्रष्टाचारय् दुथ्यानाच्चंगुलिं जनतां दु:ख सीमा:गु खँ धयादिसैं राजनीतिक दल दुने विकृत अप्वया

वनाच्चंगु खँ धयादिल। वय्कलं बिबिसी, सीएनएन, अलजजिरा, फोक्स न्यूज नेपा: भ्रष्टाचारया देय् जुयाच्चंगु धका: समाचार बियाच्चंगुलिं नेपा: अन्तर्राष्ट्रिय ख्यलय् बदनाम जुयाच्चंगु धासैं धयादिल, 'भ्रष्ट नेतातय्गु थासय् इमान्दार, सक्षम व देय् यात मतिना याइपि नेतात मा:।' ज्याभ्वलय् समाजसेवी श्रीकृष्ण मानन्धरं तोखा नगरपालिकाया वडा नं. २ व ३ य् स्थानीय पाठ्यक्रम नेपालभाषां ब्वकेगु ज्या न्ह्याय्धुंकूगु जानकारी बियादिसैं स्थानीय सरकार सञ्चालन ऐनं बिउगु अधिकार छ्यला: मांभासं ब्वकेगु ज्या जूगुलि लसता प्वंकादिल।

श्री हल्चोक...

वयाच्चंगु अनुदान नं ज्याइवलय् ल:ल्हा:गु ख:। न्हू ज्यासना पुच:यात समाजया सल्लाहकार रविकृष्ण श्रेष्ठयालिसें नागार्जुन नगरपालिका वडा नं. ३ या दुज:पिं बमबहादुर श्रेष्ठ व राधिका दर्नालिपिसं भिंतुना देछा:गु ख:। ज्याइवलय् समाजया संरक्षकपिं सागर पुतुवार व सुरज पुतुवारपिसं समाजया गठनं प्रशासनिक ज्याखँ न्ह्याकेत थ:पिन्त ग्वाहालि जूगु खँ धयादिल। वय् क:पिसं गुठी व समाज छगू हे रथया निचा: घ:चा: जूगु खँ कनादिल।

ज्याइवलय् नुग:खँ तयादिसैं मूपाहाँ लामां वडापाखें याय्मा:गु ग्वाहालि याय्त थ: न्ह्याबले तयार दुगु खँ धयादिल। वय्कलं छगू हे शीर्षकय् वडा व नगरपालिकां बजेट तय् मज्यूगु व नगरपालिकां आकाश भैरवया नितिं बजेट फ्याना तय् धुंकूगुलिं वडापाखें बजेट मतयागु

जूसां हल्चोकया म्हासीका कथं दुगु आकाश भैरवया प्याखंयात मा:गु ग्वाहालि याय्गु खँ कनादिल।

ज्याइवलय् आर्थिक प्रतिवेदन न्ह्यब्वसें दार्भिरं सुन्दर पुतुवारं थीथी संस्था व व्यक्तिपिनिपाखें समाज न्ह्याकागु गतिविधियात तिब: बीकथं ग्वाहालि याना वयाच्चंगु खँ कनादिल। वय्कलं न्ह्य:ने वयाच्चंगु हल्चोक आकाश भैरवया १२ दँया जात्रा सुथां लाक्क न्ह्याकेगु नितिं १ करोडया कोष दय्केगु तातुनागु व थुकी सकसिनं नुग: ह्वय्का: ग्वाहालि याय्त इनाप यानादिल।

छ्याज्जे सुरेन्द्रभक्त श्रेष्ठ न्ह्याकूगु ज्याइवलय् वय् कलं संस्थाया प्रगति प्रतिवेदन नं न्ह्यब्वयादीगु ख:। वय्कलं हल्चोक आकाश भैरवया जात्रापर्व सुथांलाक्क न्ह्याकेत गुथियारपाखें नं थम्हं फुचा:कथं ग्वाहालि याय्त इनाप यानादिल।

हरेक मंगलवार



मेरो साप्ताहिक

मन्त्र साप्ताहिक Mero Saptahik

माला: माला: ब्वनादिसैं ।

मिसा खलःया स्वीन्यादँ बुदिं



लहना वाःपौ/ नेपालभाषा मिसा खलःया स्वीन्यादँ बुदिं छु ज्यभूवः दथुइ हंगु दु। ज्यभूवल्य थ्रीथी व्यक्तित्व सिरपाः व सम्मान याःगु खः। ज्यइवल्य मूपाहां कथं नांजाःमह पर्यटन व्यवसायी लिसें संरक्षणविद् कर्ण शाक्यं ज्यथमह साहित्यकार फणीन्द्र वज्राचार्य, भाषा आयोगया दुजः मा. सुरेश मानन्धर, स्वर्ण पदक विजेता कासामि केदारश्वरमान स्थापित, थँजिमह आजिवन जः जलेश्वरी श्रेष्ठ व निवर्तमान नायः मंगला कार्जितयात सम्मान याःगु खः।

अथे हे कमला लुमिन नेपालभाषा हःपाः सिरपाः दाता कमला लुमिन कुमारं च्वमि भवानी तुलाधरयात व रमा-कौशल्या लुमिति सिरपाः दाता मथुरा सायूमि सिस्टर बिकुमाया कार्जित श्रेष्ठयात

लःलहनादीगु खः।

मूपाहां शाक्यं नेवाः मिसापिके नं अथाह शक्ति सुलाच्वंगु दु धासें थः मां व जहानपाखें प्राप्त जूगु प्रेरणाया प्रशंग कनादिगु खः। लिसें वयकलं ७५ दँया वैश्य थःगु व्यवसाय फुक्क काय् म्हायिपंत त्वःताः थः न्हगु चिन्तनय् लगे जुयागु व माल धाःसा उमेर वंसां नं ज्या यायेफु धइगु प्रेरणाया खँ नं कनादिगु खः। ज्यथमह साहित्यकार फणीन्द्रल वज्राचार्य नेपालभाषा मिसा खलः मिसापिन संस्था खःसां थः मिजंमह मनूयात नं हंगुलिं लसता प्वकादिल। मिसा खलःया नायः धर्मशोभा तुलाधरया अध्यक्षताय् जूगु ज्यइवल्य नेवाः देय् दबूया नायः पवित्र वज्राचार्य, श्रद्धाचारी गुरुमां, मिसा खलःया पुलांमह नायः सुवर्णकेशरी चित्रकारपिस नं नुगः खँ तयादीगु खः।

चलचित्र विकास बोर्डय् डिसी



लहना वाःपौ/ चलचित्र विकास बोर्डया न्हमह अध्यक्ष दिनेश डिसी सोमवाः पदभार ग्रहण याःगु दु। कार्यकक्षय् दुहाँ वनेवं हे श्रीमद् भागवत् गीतायात भागियानाः संस्कृतया मन्त्रोच्चारण याःगु खः।

वया लिपा छु सकिपाया निर्माण इजाजत पत्रय् लहाःचि तयादीगु खः। संचारकःमित नाप खँ लहायेगु इवल्य् डिसिं थः जागिर नयेत वइगु मखु ज्या यायेत वयागु धयादीगु खः। डिसी चलचित्र विकास बोर्डया चावहिलय् च्वंगु ज्याकुथिइ थ्यंबलय् बोर्डया कर्मचारी व चलचित्रकःमिपिंस लसकुस याःगु खः। डिसियात लसकुस याय्त बोर्डया हल्य् छगू ज्यइवः याःगु खः।

न्यू जेनिथया ई ब्लक उलेज्या



लहना वाःपौ/न्यू जेनिथ स्कूलया ई ब्लकयालिसें फुटसल ग्राउण्डया उलेज्या यँ म.न.पा.-१८ वडाया अध्यक्ष न्हछे काजी महर्जन व प्याब्सन केन्द्रिय उपाध्यक्ष गोपाल आचार्य मंकाःकथं यानादीगु दु।

स्कूलया प्रिन्सिपल राजु महर्जन लसकुस यानादिसं ज्यइवःया बारे जानकारी बियादीगु ज्यइवल्य भवन दय्केत पौने तीन करोड लागत तूगु खःसा उकी अभिभावकपिनिपाखें ८०

लाख तका लगानी जूगु कनादिल। ज्यइवल्य ८ तगिया ब्वंमिपिस लसकुस हुलाप्याखं न्ह्यब्वःगु खःसा मूपाहाँलिसें विशेष पाहाँपिस ज्यइवल्य नुगःखँ तयादीगु खः।

उलेज्या जूगु फुटसल ग्राउण्डय् शनिवाः हे न्यू जेनिथ व स्थानीय पुचःया दथुइ फुटसल कासा जूगु खः। उगु कासाय् स्थानिय टिमयात ४-२ गोल अन्तर बुकाः न्यू जेनिथ टफी थःगु ल्हातय् लाकेत ताःलाःगु दु।

भिंतुना देछा



श्री हल्चोक आकाश भैरव समाजया भाद्र १५ गते शनिवाः जूगु प्रारम्भिक साधारणसभां निर्वाचित जूगु न्हगु ज्यासना पुचःया नायः भाजु शेर बहादुर पुतुवार, न्वकु भाजु जीवन पुतुवार, छ्याज्जे भाजु सुरेन्द्रभक्त श्रेष्ठ, ल्यूछ्याज्जे भाजु शुक्र पुतुवार, दांभरिं भाजु सुन्दर पुतुवार व दुजःपिं भाजु नृपेन्द्रलाल श्रेष्ठ, भाजु अर्जुन पुतुवार, भाजु पुर्ख पुतुवार, भाजु दानकान्छा पुतुवार, मय्जु सुनिता पुतुवार व मय्जु लक्ष्मी पुतुवारपिनि कार्यकाल सुथां लाय्मा। थुगु ज्यासना पुचःलिसें समाजया उद्देश्यकथं हल्चोक आकाश भैरवया जात्रा पर्व संस्कृतियात च्वन्त्याका यंके फय्मा धइगु मनंतुसें भिंतुना देछानाच्चना।

लहना वाःपौ

सकल जः

स्वच्छ समाजको निर्माणमा सहभागी बनौं

- सम्भव भएसम्म बिद्युतीय चुलो प्रयोग गर्न प्रोत्साहन गरौं,
- प्लाष्टिकजन्य सामग्रीको प्रयोगलाई निरुत्साहित गरौं,
- वनक्षेत्रको अतिक्रमण र डढेलो नियन्त्रण गरौं,
- हिमताल, जलाधार, सीमसार तथा पानीका स्रोतहरूको संरक्षण गरौं,
- नदी र खानीजन्य स्रोतको उत्खननलाई व्यवस्थित गरौं,
- भिरालो वा तटीय जमीन सुरक्षित गर्न बायो-इन्जिनियरिड प्रविधिको प्रयोग गरौं,
- पारिस्थितिक प्रणाली (Ecosystem) को संरक्षण गरौं।



नेपाल सरकार

विज्ञापन बोर्ड

छत्रपाटी निःशुल्क चिकित्सालय (अस्पताल)

"स्तरीय शुलभ स्वास्थ्य सेवा सकसिया निति, असहायया निति त्रक निःशुल्क"

उपलब्ध सेवा

- उद्देश्य घण्टा सेवा
- ईमरजेन्सी
- प्याथोलोजी
- एक्स रे
- ई सी जी
- औषधि पसल
- अन्तरंग सेवा

शल्यक्रिया

- मोसिनि
- अन्तर गवरी
- बक हान घाँटी सम्बन्ध
- हृदय रक्त वात सम्बन्ध
- बिना विचार पित्त नलीको पत्तर सम्बन्ध

बहिरंग सेवा

- मुटु रोग
- पेठ रोग
- घुरीलोजी
- नवी रोग
- बाल रोग
- बढान रोग
- बल रोग
- अंधा रोग
- अन्तर गवरी
- बक तथा वीर रोग
- नाक कान घाँटी रोग
- अन्तर गवरी रोग
- माइरोइड
- मधुमेह

मेमेम सेवा

- टेसिड
- इण्ट्रोकोपी
- कोनोकोपी
- फ्रिजिभेरापी
- अन्तःशरीर, कन्ट्रोल र टुको
- पुर्णतः नरको बल प्रयोग
- टि.एस.ए. इन्टर



२४ घण्टा
ईमरजेन्सी सेवा

७७८ गंगाखाल मार्ग, छत्रपाटी, काठमाडौं, फोन: ४२१६१३८, ४२५७९९९, ४२६६२२९